

# Grazia allas fatschentas secundaras

La Gruppa dalla Arena Alva ha presentau bunas cefras da fatschenta

DAD ANDREAS CADONAU

■ **La gruppa dalla Arena Alva ha pudiu tener la sviulta ed augmentar il cash flow egl onn da fatschenta 2013/14. Malgrad las bunas cefras ei la fatschenta da coc dallas pendicularas buca cuntenteivla e pretenda novs sforzs.** «Fadigiar daners ei momentan difficil ella fatschenta da transportar persunas sil cuolm.» Adrian Wolf, responsabels per las finanzas ed il personal enteifer la Gruppa Arena Alva, ha explicau ier il quen da fatschenta. Malgrad las difficultads digl unviern sa la gruppa presenter bunas cefras. Il cash flow ei s'augmentaus per 2,2 pertschien sin 21,5 milliuns francs ed appartegn cheutras ad in dils megliers resultats dalla gruppa. La sviulta ha l'interpresa medemamein pudiu tener ed il quen nota in gudogn brut da 3,8 milliuns francs. Las cefras positivs ein denton d'attribuir en emprema lingia alla gastronomia che ha pudiu augmentar siu recav considerabla duront la stad 2013, ed alla sparta dil Rock Resort cun vender ed affitar habitaziuns.

Adrian Wolf ha buca tralasciau da visar alla munglusa sviulta dalla sparta da transport. Il diember dallas empremas entradas dalla stagiun d'unviern ei seminuus per tschun pertschien visavi allas entradas gia limitadas digl onn precedent. Il cau da finanzas dalla Arena Alva ha visau vinavon al trend dils onns vargai cun in minus d'empremas entradas da 70 000 ella media. Visavi igl unviern da record 2002/03 mauncan schizun 200 000 empremas entradas. Adrian Wolf ha puntuau la strategia dall'interpresa da seconcentrar egl avegnir sin la fatschenta da coc. El ha dau d'entellir che l'infrastructura seigi buca construida sulet per las 900 000 empremas entradas.



Ina part dalla gestiun dalla Gruppa Arena Alva cun la nova cabina dalla pendiculara da La Siala: Reto Poltéra, Reto Gurtner, Adrian Wolf e Christoph Schmidt (da sen.).

FOTO A. CADONAU

Investiziuns en quella infrastruttura ein denton vinavon prevedidas. Las lavurs da remplazzar la sutgera da La Siala han gest entschiet. Il niev indrez cun cabinas da diesch persunas vegn ad esser promts sin la sesiun 2015/16. Malgrad tuttas investiziuns succedidas els onns vargai eis ei reussiu alla Gruppa Arena Alva dad augmentar la quota dad agen capital sin 33,1 pertschien.

## Ina strategia secumprovada

Il president dil cussegl d'administraziun e tgamun dalla gestiun, Reto Gurtner, ha tschintschau dad in resultat extraordinari. Tenor sias explicaziuns ei il resultat da fatschenta vegnius a strada grazia ad ina strategia da fatschenta secumprovada. El ha visau al success dil Rock Resort, schegie che biars hagian dubitau quei model da fatschenta. Oz generescha la gruppa

Arena Alva cun il Rock Resort ed ils ulteriurs stabiliments 48 pertschien dallas pernottaziuns dalla regiun turistica Flem/Laax/Falera. Aschia preveda la Arena Alva dad investir egl avengir vinavon en quei sector. Planisai ein treis entochen quater novs baghetgs. Reto Gurtner ha visau alla digren dil turissem alpin ed en special quel dil cantun Grischun. In turissem curdaus ord tuttas ranga-

ziuns turisticas cun ina considerabla digren dallas pernottaziuns. El pretenda novas strategias per dar damogn alla sfida ed ha gest aunc presentau sias visiuns per la Arena Alva. Reto Gurtner ha plidentau ils paucs menaschis da transport rendiveils ellas muntognas, sco per exempel la «Jungfraubahn» ni las pendicularas dil Titlis. Interpresas che pretendan in prezi che po curclar il cuosts. «All inclusive funcziuna buc.» El center dallas ponderaziuns da Reto Gurtner stat aunc adina la nova generaziun cun in'otra vesta e cun basegns semidai. Quella generaziun vul Reto Gurtner plidentar e carmalar sil cuolm. Denter auter cun ina engrondida mesapipa che vala per la pli gronda dil mund. Tenor Reto Gurtner ei la generaziun giuvna sportiva e posseda in grond basegns da semover, in avantatg per il turissem alpin.

## Igl ypsilon ei la suletta varianta

Extendidamein ei il menagegiun dalla Gruppa Arena Alva sefatschentaus cun la nova colligiazun da Cassons. Tenor las imaginaziuns dallas pendicularas e sco Reto Gurtner ha puntuau, era dalla vischnaunca da Flem, ei la suletta varianta realisabla in niev access neu da Stargels, igl aschiumnau ypsilon. Sulet quella varianta valetescha il meinagegiun per cunvegnetta. Inaga visavi allas pretensiuns neu dil schurmetg dalla cuntrada ed era puncto rentabilitad ed integraziun ella infrastruttura existent. Novas vias tscherca la Gruppa Arena Alva enten collaborar cun ina gruppa chinesa activa el sport d'unviern. Ed in auter novum sedrezza als possessurs dil telefonin cun access egl internet. Ina applicaziun tradescha il diember da gliend che spetga avon mintga pendiculara dalla Arena Alva e lubescha dad untgir cheutras colonnas.

# Flavia Schnoz el final dil campinadi svizzer

La giuvna miradura da Mustér ha surmuntau la qualificaziun e semesira quest'jamna a Berna

DA HANS HUONDER / ANR

■ **Quest'jamna han ils campinadis svizzers dallas professiuns liug a Berna. Dalla partida ei era ina miradura sursilvana. Flavia Schnoz da Mustér ha surmuntau cun grond success las rundas da qualificaziun e sa aschia separticipar al final dils miradurs.** Ils campinadis han liug dils 17 entochen ils 21 da settember 2014. Giuvnas e giuvens che han fatg lur emprendissadis en rodond 130 professiuns dils secturs dil mistregn, industria e survetsch da prestaziun separticipeschan a quei arranchament naziunal. En 70 professiuns vegnan ils campinadis erui. A «Swiss-Skills» – sco il campinadi vegn numaus – ein rodond 1000 giuvnas e giuvens concurrents dalla partida. Ils organisaturs da quei campinadi che ha liug ella Arena Postfinance a Berna spetgan rodond 200 000 visitadras e visitaders.

## Ina giuvna denter giuvens

Il mistregn da miradur ei buca gest la clamada classica dallas dunnas. Tonaton san era quellas esser fetg qualificadas en quella professiun. Quei demuossa Flavia Schnoz (19) da Mustér. Uonn ha ella terminau igl emprendissadi ch'ella ha absolvu tier l'interpresa da baghegiar Berther a Mustér. Ella ha fatg quei cun bravura e la nota da 5,3 ei stada la secunda megliera egl entir cantun Grischun. Buca da far curvien ch'ella ei lu era vegnida proponida per las concurrenzas da qualificaziun per ils campinadis svizzers. En quellas rundas ha ella adina tenu petg als giuvens e la fin finala ei la gronda finamira

– la qualificaziun pil final – daventada realitad. «Per mei ei quei gia in grond success. Tut quei che vegn uss aunc ei supplementar», di Flavia Schnoz. Las rundas da qualificaziun a Moutier e Sogn Gagl quantan medemamein tiel resultat final a Berna. Ella rangaziun d'entochen ussa sesanfla la giuvna sursilvana sil tschunavel plaz. In plaz sil podest ei aunc pusseivels, la distanza da puncts ei buca

gronda: «Jeu hael in fetg bien sentiment.» Al campinadi svizzer a Berna vegnan la miradura ed ils miradurs confruntai cun treis lavurs. Da tgeininas ch'ei setracta san els buca. «Quei vegn ad ir ella direcziun dallas lavurs da qualificaziun, pia per exempel la construcziun da mirs», relata la giuvna miradura. Pils finalists ei vegniu organisau l'jamna vargada in trenament intensiv a Sursee. Flavia

Schnoz ei la suletta dil Grischun en quei final dils miradurs. Per la Sursilvana ei quei l'emprema participaziun al final. Pils dils finalists ein gia ina secunda ga dalla partida. Igl emprem dil final sa lu separticipar al campinadi mundial.

## Entular e far mir

Ella vegliadetgna da 13 onns ha Flavia Schnoz giu la caschun da luvrar duas

jamnas ella fatschenta da baghegiar da Gion Michel Flepp. «Quella lavur ha plauschiu a mi fetg bein e suenter in fuffernadi tier l'interpresa Berther sundel jeu sedecidida d'emprerder da miradura», di Flavia Schnoz ch'ei fetg engaschada era sportivamein cun unihoc e snowboard. Ils fuffernadis sco mecanista e polimecanista han buca perschuadiu ella. Ella ei pér la secunda suenter ina Lumneziana cha ha empriu da miradura en Surselva. Cun la lavur sil baghetg vegn ella bein a frida: «Sch'ins sto purtar sacs da 40 kilos d'ina scala siadora sch'ei quei schon magari stregn. Cargas grevas eis ei denton era pusseivel da transportar cun tschaghegnas. Mirau sur tut ora eis ei denton ina fetg interessanta lavur ed jeu saiel ensesez cussegliar a mintga giuvna da far quei emprendissadi. En quella clamada vegnan era dunnas acceptadas. La cundiziun ei secapescha ch'ins muossi ch'ins vegli era luvrar ed emprender.» Il pli bugen lavuri ella vid entuladas e mirs. Perencunter seigien drenaschas buca gest sia lavur preferida. La proxima finamira professiunala da Flavia Schnoz ei la scola da polier. La scola cuoz treis onns e vegn absolvada en blocs da cuors parallelmeinsper la lavur. Era suenter quella scolaziun vul ella restar fideivla al sector da baghegiar. Il final dil campinadi svizzer dils miradurs a Berna entscheiva la gievgia avonmiezdi allas 09.00 e vegn terminaus la dumengia suentermiezdi.



Flavia Schnoz s'aida denter las meglieras ed ils megliers miradurs dalla Svizra da sia vegliadetgna.

FOTO H. HUONDER

Tgi che vul sustener Flavia Schnoz al final sa nezegiar il link [www.ssb14.ch/247](http://www.ssb14.ch/247) ed empustar leu bigliets d'entrada pil final svizzer.